
ФАРҒОНАДА ҲУНАРМАНДЧИЛИКНИНГ ЯНГИ ТИЗИМИ ЯРАТИЛДИ

Марғилон шаҳрида Ҳунармандлар бозори ҳамда Ҳунармандчилик марказининг очилиш маросими бўлиб ўтди.

Мамлакатимизда тарихимиз, миллий ўзлигимиз тимсоли бўлган, қадимий ва бой анъаналарга эга ҳунармандчилик соҳасини ривожлантиришга катта эътибор қаратиб келиняпти. Ҳунармандлар меҳнатини қадрлаш, уларнинг самарали фаолият юритишлари учун тегишли ҳуқуқий асос, имконият ва имтиёзлар яратиб берилмоқда. Мазкур соҳа вакиллари янги иш ўринлари яратиш, ёшларни ижтимоий меҳнатга жалб этиш, туризмни ривожлантиришга катта ҳисса қўшмоқда.

Буюк ипак йўлида жойлашган қадимий ва навқирон Марғилон шаҳри ҳунармандчилик мактабининг таърифига ортиқча ҳолат йўқ. Бугунги кунда мингдан ортиқ хонадон ҳунармандчилик билан шуғулланади. Расмий фаолият юритаётган “Ҳунарманд” уюшмасига аъзо бўлганлар сони 527 нафарни ташкил этиб, уларнинг мингдан ортиқ шогирдлари бор. Бу ерда миллий матолар адрас, атлас ва улардан тикувчилик буюмлар ишлаб чиқариш, миллий пойабзал ишлаб чиқариш, ёғочсозлик, ёғоч ўймакорлиги, дўппидўзлик, тўнчилик, темирчилик, мисгарлик каби йўналишларда ҳунармандлар фаолият кўрсатмоқда. Шаҳарда “Ўзбекипаксаноат” ва “Ҳунарманд” уюшмалари ҳамкорлигида экспорт қилишга мўлжалланган “Silk ikat and carpet” масъулияти чекланган жамияти ташкил этилиб, ипак гилам ва атлас- адрас ишлаб чиқариш йўлга қўйилган. Ҳунармандлар бозорининг бунёд этилиши ҳам соҳага бўлган юксак эътибор ифодаси бўлди.

“Пичоқчилар” маҳалла фуқаролар йиғинида амалга оширилган мазкур лойиҳа учун 35 миллиард сўм маблағ сарф этилиб, 300 та янги иш ўринлари яратилди. Биринчи қаватда 45 нафар ҳунарманд фаолияти йўлга қўйилган. Иккинчи қаватда эса 14 та савдо дўкони бор. Шаҳарга келган хорижлик сайёҳлар бу ерда миллий ҳунармандчилик маҳсулотлари билан танишиб, уларни харид қилиши мумкин. Иброҳимжон Султонов ташаббуси билан давлат-хусусий шериклик асосида қурилган Ҳунармандлар маркази Марғилоннинг энг сеvimли ва сайёҳлар учун манзур бўладиган маскани бўлади. Унинг очилиш маросимида ана шу жиҳат алоҳида таъкидлаб ўтилди. 600 нафар уста фаолият бошлаб, 200 ортиқ турдаги атлас ва адрас тўқиш, гиламчилик, майший хизмат, тикувчилик, ҳунармандчилик маҳсулотлари ишлаб чиқариш йўлга қўйилди. Улар томонидан 2 мингга яқин хотин-қиз, ёшлар ишга жалб этилди. Икки қаватли марказнинг қуйи қаватида атлас, адрас, шойи, баҳмал, беқасам матолар тўқилади. Биринчи қаватдан тайёр маҳсулотлар кўргазмаси, подиум, чевархона ўрин олган. Бу ердаги дўкonda матога гул чизиш, боғлаш, давра, қад тайёрлаш жараёнлари кўргазмали тарзда намойиш этилади. Бинонинг юқори қаватида гилам цехи жойлашган. Бу ерда барча маҳсулотлар тўлиқ қўл меҳнати ёрдамида, 100 фоиз тоза ипакдан тўқилади. Давлатимиз раҳбари жорий йилнинг 5-6 июнь кунлари Фарғона вилоятига ташрифи чоғида мазкур Ҳунармандлар марказида бўлиб, унинг фаолияти билан танишди. Бу эса барча ҳунармандларга ғурур ва ифтихор бағишламоқда.

- Мазкур марказ муҳтарам Президентимизнинг ташаббуси билан бунёд этилди -дейди вилоят раҳбари. - Инсон манфаатлари юртимизда доимо улуғ. Мана шу марказнинг ўзида аёлларимиз, ёшларимиз учун икки мингдан ортиқ иш ўрни яратилган. Аммо бу ҳали ҳаммаси эмас. Ҳозир МДҲ давлатларида фаолият олиб борадиган энг моҳир дизайнерлар бу ерда фаолият кўрсатмоқда. Уларнинг таъкидлашича, бу марказга жаҳоннинг барча давлатларидан қизиқиш кучли. Ўйлайманки, бу ерга дунёнинг барча бурчакларидан ҳунармандчиликка иштиёқи бўлган инсонларнинг албатта, қадами етади.

Фарғона вилояти ҳокимлиги Ахборот хизмати
2020-06-08 17:15:51